

《張掖古志》編修校點委員會編

張掖古志




張鴻清 主編

十三州志

〔北涼〕闕駟 著
張鴻清
〔清〕張澍 輯
石歡歡 校點

總八函〔五十七冊〕

第一函〔計五冊〕
第二冊

 甘肅文化出版社

重刊凡例

◎《張掖古志》分影印、校注、重刊三個版本。

◎《張掖古志（重刊本）》以下簡稱「本志」。以『保護、傳承、實用』為原則。共輯錄

重刊涼州、河西、陝西行都指揮使司、甘肅鎮、甘州府、高臺縣、東樂縣、民樂縣、山丹縣、臨澤縣等與張掖歷史相關的方志類書三十九部，種類包括地理志、山水志、圖說、賦役全書、考見略、鎮志、府志、縣志、水利志、採訪錄、要覽、鄉土志等。

◎本志輯錄重刊的張掖方志類古籍，其編纂年代上限始于東晉永和三年（公元三四七年），下限為民國三十八年（公元一九四九年）。

張掖古志

重刊凡例

◎ 二

◎本志爲套書，收錄方志古籍三十九種，總八函，五十七冊，二百三十九卷，二千二百餘萬字。原則上依據現張掖行政區劃和時間順序編輯成函，每函若干冊。函套封面列本函所錄志書名，函中每冊封面注明總函數、冊數和第幾函、計幾冊、第幾冊，每函第一冊冊首置本志編修校點委員會名單和序言。

◎本志以《張掖古志（影印本）》所輯錄方志古籍爲底本，通過參考有關史志資料，加以校勘、標點重刊。主要解決善本蠹損、殘缺、漫漶不清及沒有斷句，不方便今人閱讀等問題。

◎本志所輯錄重刊的每部志書，均由主編撰寫《導言》，分別置于志前，說

明重刊所據版本，以及該志成書背景、主要內容、編撰者簡介等，起開宗明義之作用。

◎本志充分尊重所選底本體例，采取古法排版、綫裝，除封面統一用簡體字外，卷內均用繁體字。所選底本中存在的錯別字，在本次重刊中皆加以匡正，繁體字全部以國家現行通用規範繁體字替換，通假字、假借字、異體字、古今字、俗體字，國家有現行通用規範繁體字的，按統一規範字替代，反之則遵從底本原字。

◎本志將所錄方志古籍中的避諱字全部回改。

◎為方便讀者閱讀檢索，本志每函于函套封面編有總目，列每函所錄志書書

名。每函中，一部志書分爲若干冊的，在第一冊編有該部志書目錄，多冊頁碼連續排印；一部志書單爲一冊的，在冊前編其目錄，一冊頁碼自爲起迄；多部志書合爲一冊的，在冊前編有該冊每部志書目錄，每部志書分別設內封，分冊內封後再設該志目錄，一冊頁碼自爲起迄。

◎凡本志所錄方志古籍中，有關農民起義和影響民族團結的蔑稱表述，以及原著缺字和經考據確無法辨識、補出的文字脫缺，採用以相應字數的『□』替代。

◎本志按照每部志書編纂成書的時間，在編著者姓名前冠以成書朝代；後世輯錄本，加注輯錄作者和輯錄成書朝代；重修本，注明原著作者、成書朝

代和重修作者及重修成書朝代；同時，注有本次重刊校點作者姓名。

◎本志為衆手成志，根據國家最新舊志整理要求，分別校點整理，由主編統稿，并撰寫《重刊後記》，附于每函最後一冊冊尾。

張掖古志

重刊凡例

導言

《十三州志》，又名《十三州記》，是全國地理總志。約成書于北涼永和五年，共十卷，一說十四卷。

該志以東漢全國版圖內所設十三個州的行政區劃為綱，即司隸州、荊州、豫州、冀州、并州、兗州、幽州、徐州、青州、揚州、益州、涼州、交州，分別記各州地理、歷史、民族、經濟、文化等內容，系統介紹各地的郡縣沿革、河道發源及流向、社會風俗等情況。

《十三州志》，闕駟著。闕駟，字玄陰，敦煌人。他博通經傳，聰敏過人，三史群言，經目則誦，時人謂之宿讀。注王朗《易傳》，學者藉以通經。

唐代史學評論家劉知幾在《史通》中這樣評價《十三州志》：『地理書者，若朱贛所采，浹于九州；闕駟所書，殫于四國。斯則言皆雅正，事無偏黨者矣。』

《十三州志》約傳至北宋以後散佚。但在後世魏颺道元《水經注》、唐朝顏師古《漢書地理志注》多有徵引。到清代，甘肅武威人張澍從《水經注》《史記索隱》《漢書注》《後漢書注》《北堂書鈔》《太平御覽》等三十多種著作中，輯錄出《十三州志》佚文二百九十九條，考證糾誤，并按地域進行排比，編集成書，收入《二酉堂叢書》。

《十三州志》是闕駟居涼州所著，故記涼州河流、山川、地名、物產等事更爲

詳備，是研究東漢、魏晉、五涼時期張掖及河西地區地理、歷史、民族、經濟、文化等情況，以及郡縣沿革、河道發源及流向、社會風俗等方面的重要史料。

本志以《張掖古志（影印本）》所輯《十三州志》為底本，校點重刊。

十三州志

導言

《張掖古志（重刊本）》第一函第二冊《十三州志》目錄

重刊凡例	一
導言	一
序	一
魏書本傳	三
十三州志	四

十三州志

目錄

序

案《水經注》引樂資《九州記》、應劭《十三州記》，又引黃義仲《十三州記》；《南史》梁吳均著《十二州記》十六卷，《藝文類聚》有黃恭《十四州記》，今其書皆佚。後魏敦煌闕玄陰纂《十三州志》。據《隋志》十卷，《唐志》則十四卷，《十六國春秋》十卷。

《史通·雜述篇》云：『郡書如常璩之詳審，劉昞之該博，能傳不朽，見稱來裔。』又云：『地理書者，若朱贛所采，浹於九州。闕駟所書，殫於四國。斯則言皆雅正，事無偏黨。』顏師古《漢·地理志注》多引之，其言曰：『中古以來，說地理者多矣，或解釋經典，或纂述方志，競爲新異，妄有穿鑿，安

十三州志

序

◎ 二

處附會，頗失其真。』今并不錄，獨有取於闕氏，可知其書之精審，所惜散逸不傳，他書徵引者亦復寥寥。余搜香傳注，都爲一卷，斷珪碎璧，彌覺可珍云。

魏書本傳

闕駟，字玄陰，敦煌人也。祖倞，有名於西土。父玖，爲一時秀士，官至會稽令。駟博通經傳，聰敏過人，三史羣言，經目則誦，時人謂之宿讀。注王朗《易傳》，學者藉以通經。纂《十三州志》，行於世。蒙遜甚重之，常侍左右，訪以政治損益。拜祕書考課郎中，給文吏三十人，典校經籍，刊定諸子三千餘卷。加奉車都尉。牧犍待之彌重，拜大行，遷尚書。姑臧乎，樂平王丕鎮涼州，引爲從事中郎。王薨之後，還京師。家甚貧敝，不免饑寒。性能多食，一飯至三升乃飽。卒，無後。

十三州志

〔涼〕 祕書考課郎中 闕駟纂 〔清〕 武威 張澍輯

大郡曰守，小郡曰尉。《史記·索隱》

澍案黃義仲《十三州記》曰：『郡之言君也，改公侯之封而言，君者，至尊也。郡守專權，君臣之禮彌崇。今「郡」字，「君」在其左，「邑」在其右，「君」爲元首，「邑」以載民，故取名于「君」，謂之「郡」。』

成帝時，河堤大壞，汎濫青、徐、兗、豫四州略徧，乃以校尉王延代領河堤謁者，秩千石，或名其官爲護都水使者。中興以二府掾屬爲之。《後漢書注》

典屬國，武帝置，掌納匈奴降者也。哀帝省并大鴻臚，故今復置之。《後漢書注》

澍案《前漢書》西河郡美稷縣、上郡龜茲縣并有屬國都尉，其秩比二千石。

大夫皆掌顧問、應對、言議，夫之言扶也，言能扶持君父也。《後漢書注》

澍案大夫，指光祿、大中、中散、諫議大夫也。

護烏丸擁節，秩比二千石，武帝置，以護內附烏丸，既而并於匈奴中郎將。中

興初，班彪上言宜復此官，以招附東胡，乃復更置焉。《後漢書注》

澍案：丸，一作『桓』，古字通。

計偕，秦漢謂諸侯朝使曰計偕。偕，次也。晉代有計偕簿。《漢書注》

澍案顏師古曰：計者，上計簿使也，郡國每歲遣詣京師上之。偕者，俱也。令所徵之人，與上計者俱來，而縣次給之食。後世訛誤，因承此語，遂總謂『上計』爲『偕計』。闕駟不詳，妄爲解說，又改『偕』爲『階』，失之彌遠。是玄陰本

文作『計階』也。

侍御史，周官，即柱下史，秩六百石，掌注記言行，糾諸不法，員十五人。出有所案，則稱使者焉。《後漢書注》

謁者，秦官也。員七十人，皆選孝廉年未五十，曉解僨贊者。歲盡，拜縣令長史及都官府丞長史。《後漢書注》

澍案：劉放云縣令長下多一『史』字。

博士，秦官。博通古今，秩皆六百石。孝武初置五經博士，後稍增至十四員。取聰明威重者一人爲祭酒，主領焉。《後漢書注》

武帝時，置博士弟子，太常擇人年十八以上儀狀端正者補焉。昭帝增員

滿百人，宣帝倍之，元帝更設員千人，成帝更增員三千人。《後漢書注》

長相，縣爲侯，邑則令，長爲相，秩隨令長本秩。《後漢書注》

澍案長爲縣長，相爲侯相也。

將兵長史，居在日南郡。又有將兵司馬，去雒陽九千六百三十里。《後漢書注》

有秩嗇夫，得假半章印。綸，青絲綬也。鄭玄注《禮記》曰：「綸，今有

秩嗇夫所佩也。」《後漢書注》

京兆虎牙，扶風都尉。以涼州近羌，數犯三輔，將兵衛護園陵。扶風都

尉居雍縣，故俗人稱雍營焉。《西羌傳》云：「虎牙都尉居長安。」《北堂書鈔》

虎賁，《書》稱虎賁三百人，言其猛怒，如虎之奔赴也。孝武建元三年，初

置期門。平帝元始元年，更名虎賁郎。又武帝太初元年，初置建章營騎。後更名羽林，以天有羽林之星，故取名焉。又取從軍死事之子孫養羽林官，教以五兵，號曰羽林孤兒。光武中興，以征伐之士勞苦者爲之，故名羽林士。《漢

官儀》《漢書·百官公卿表》

赤水西有白玉山，山有西王母堂室。《太平御覽》

澍案《前涼錄》，馬岌言南山有石室王母堂，珠璣鏤飾，煥若神居。即此。

奄蔡、粟特各有長，而魏收以爲一國，謬也。《太平御覽》

澍案《漢書解詁》云：『奄蔡，即闐蘇也。』《魏略》云：『西與大秦通，東南與康居接。其國多貂，牧畜水草。』《周書》云：『粟特國，在蔥嶺之西，蓋

古之奄蔡，一名温那沙。』亦以爲一國。又名『粟弋』，又名『特拘夢』。出大禾，高丈餘，子如胡豆。在安息北五千里，附庸小國四百餘城。太武帝時，遣使朝貢。

小宛併於鄯善。《寰宇記》

澍案扞零城小宛國王治西北，至都護治所二千五百五十八里，東與婁羌接。

玉門縣置長。三百里石門，周匝山間，裁經二十里，衆泉流入延興。漢

罷玉門關屯，徙其人於此，故曰玉門縣。《太平寰宇記》

澍案《地理志注》，引『漢罷玉門關屯徙其人於此』一句。

昭武蘇有臨澤亭，在其東。《初學記》

舍衛國，在月氏南萬里，果大如三斗杓。一作盆。《食經》曰：『種名果法，取

好直枝，內著芋魁中種之。』

《太平御覽》

僧彊

一作彊
疊

中國，在天竺南，佛寺三千餘所。今一作其地有神珠，非石非玉，晝

夜於國中光明如日。珠徑一尺五寸，其色正碧。

《太平御覽》

烏孫國嫁娶，責馬聘。先令媒者與婦宿，徐乃婿近。《太平御覽》

崑崙，正在西海之戍地，北一作東海之亥地，去岸十三萬里。有弱水周回繞

匝。山南接積石糸圃，西北接北戶之堂，東北臨大活之井，西南至承淵之谷。此

四角大山，實崑崙之支輔也。《博物志》

澍案孫穀《古微書》，引《十三州志》『支輔也』句下。又有云：『積石圃

南頭，昔西王母告周穆王，去咸陽三十六萬里，山高平，去地三萬六千里。上

有三角面方廣萬里，形如偃盆，上有金臺玉闕，亦玄帝之所合天帝君所治處也。』

瓜州戎爲月氏所逐，并六國，築長城，西不過臨洮，則秦未有此地。漢武帝後元元年，分酒泉之地置敦煌郡，徙邊人以實之。應劭云：『敦，大也；煌，盛也；故以名之。後魏天興三年，涼昭王立於敦煌，以子讓爲之郡守，分敦煌之涼興、烏澤、晉昌之宜禾三縣，置涼興郡焉。』《太平寰宇記》

蔥嶺以東，人好淫僻，故龜茲、于闐置女市以收錢。《太平廣記》

婁羌國濱帶南山，西有蔥嶺餘種，或虜或羌，戶口甚多也。在古不立君臣，無分長幼，疆則分種爲酋豪，弱則爲人附落，更相鈔暴，以力爲雄，唯殺人償死，無他禁令。其兵長於山谷，短於平地，不能持久，而果於觸突，以戰死爲利，病

終爲不祥。《太平寰宇記》

澍案媯羌地少五穀，以畜牧爲業，其俗氏族無定，或以父名母姓爲種號。《廣志》云：『媯羌與北狄同，其人魯鈍，饒妻妾，多子姓，一人生子數十或至百人。嫁女得高貲者，聘至百犢。女披火華氈，以爲盛服。一狗皮直數十匹。』效穀縣，故魚澤障。《初學記》

澍案《前漢·地理志》云：『桑欽說孝武元封六年，濟南崔不意爲魚澤尉，教力田，以勤效得穀，因立爲縣名。』

高昌壁，故屬敦煌。有長谷在東，都尉居之。《初學記》

澍案本漢車師國之高昌壁。《後漢書》云：『車師國，在車師城。後漢和

帝永元三年，班超定西域之後，置戊己校尉，領兵五百人，居車師前壁，即高昌壁也。漢武帝遣兵西討，師旅頓弊，其中尤困者因駐焉。地勢高敞，人庶昌盛，故立高昌壁。壁有人入城，其實本中州人，故目高昌爲地之稱。晉咸和中，張駿于此立高昌郡。後魏孝武時，有闕爽者，自爲高昌太守。至真君中爲沮渠無諱所襲，因據之。至和平元年，爲蠕蠕所併。蠕蠕以闕伯周爲高昌王。自此以後，每有立者輒爲人所殺。其後立麴嘉爲王，傳國九代，至智盛，不循職貢。唐貞觀十四年，討平，以其地置西州。《漢書》云：「高昌之地，饒漆、蜜，多葡萄、香棗、金、鐵，婦女以婆羅樹績白疊布。」

福祿城，謝艾所築，下有金泉，味如酒。有人飲此泉水，見有金色從山

中照水，往取得金，故名。《括地志》

澍案應劭《漢官儀》曰：『酒泉城下有金泉，泉味如酒，故曰酒泉。是金泉，即酒泉也。』

淵泉，縣名，地多泉水，故以為名。在今瓜州晉昌縣東北。《漢·地理志》

澍案：《張奐傳》注如此，係《十三州志》原文補之。《地理志》引闕駟云：『地多泉水故以為名。』

左南津西六十里，有白土城，城在大河之北，而為緣河濟渡之處。魏涼州刺史郭淮破羌遮塞於白土，即此處矣。《水經注》

澍案：郭淮為雍州刺史，此云涼州，誤矣。

白石縣，在狄道西北二百八十五里，灑水逕其北。《水經注》

澍案《漢書·地理志》：『灑水出西塞外，東至枹罕入河。』應劭曰：『故

罕羌侯邑也，白石山在東。』酈道元曰：『今灑水逕其南而不出其北也。』

朱圉有石鼓，不擊自鳴，鳴則兵起。《太平御覽》

澍案《漢·地理志》：『天水冀縣有朱圉山，在縣南梧中聚。』

廣大阪，在枹罕西北，罕并在焉。昔慕容吐谷渾自燕歷陰山西馳，而創

居於此。《水經注》

枹罕縣，在隴西郡西二百一十里，灑水在城南門前東過也。《水經注》

澍案《地理志》『灑水出西塞外，東至枹罕入河』。《周地記》云：『枹罕，即

故罕开侯邑。』《水經注》：『灑水又東北，逕石門口。山高險，對崖如門峽，故得名。疑即皋蘭山門也。』

石城西一百四十里，有左南城。前涼張瑁從左南緣河而截趙麻秋軍，即此地。《水經注》

石城謂之石城津，在金城西北。《水經注》

澍案：河水東逕石城南，謂之石城津；又東南逕金城縣，故城北。

左南城，河水經其南，故曰左南。《圖經》

澍案：張天錫討羌廉歧，使掌璩向左南。

安故縣，在隴西郡南七十里。蓋延轉擊狄道安故五谿反羌，大破之，即

此也。《水經注》

澍案《北堂書鈔》引云：『安故縣，在漢陽郡西南四十七里。』

狄道故城，今日武始也。洮水在城西北流。《水經注》

澍案《寰宇記》引云：『降狄道今日武始。』又案狄道，惠帝時改爲武始郡，以狄道爲降狄道。

狄道西北二百八十五里，有白石山。《太平御覽》

澍案《漢·地理志》：『《禹貢》養水所出，至武都爲漢。』師古曰：『氏之所居，故曰氏道。』《地理志》云：『狄道東有白石山。』

大夏縣西有故金紐城，去縣四十里，本都尉治。《水經注》

澍案《前涼錄》：『張駿十八年，分武始、晉興、廣武置大夏郡及縣，取縣大夏水爲名。』《水經注》：『濫水西北流，注於洮水。洮水右合二水，左會大夏川水，水出西山，二源合捨而亂流，經金紐城南。』《寰宇記》：『有金劍故城，一號金柳城。疑金柳即金紐也。』

允吾縣西四十里，有小晉興城。湟水又東與閤門河合，即浩亶河也。浩，讀『閤』，故亦曰閤門水。《水經注》

澍案：一引『晉興城』下，有『爲今之古鄯地』六字。《漢·地理志》：『浩亶水出西塞外，東至允吾，入湟水。』師古曰：『亶者，水流峽山，岸深若門也。』「浩」音「誥」。疾言之，浩爲閤耳。』

允吾縣西，即湟水之源也。《水經注》

澍案《地理志》：『烏亭逆水出參街谷，東至枝陽入湟。』應劭曰：『允吾，音鉛牙。』

湟水東流，逕湟中城北，故小月氏之地也。《太平御覽》

澍案：湟水本漢破羌縣地，屬金城郡。漢破匈奴，取西河地，開湟中，處月氏，即此。湟水，俗呼湟河，又名樂都水。南涼禿髮烏孤始都此。

湟水河在破羌縣南門前，東過六合水，自南破羌水，自北左右翼注。《水經注》

澍案《水經注》引無『東過六合水』以下數字，《寰宇記》有之。應劭云：『漢宣帝神爵二年，置破羌城。』

西海縣 《寰宇記》引作「允吾縣」。 西有卑禾羌海，世謂之青海，東去西平二百五十里。《水

經注》

澍案《初學記》引云：『臨羌縣西有卑禾海，謂之青海。』

臨羌新縣，在西海郡西百八十里，湟水逕城南也。城有東西門，西北隅有子城。湟水又東，右合溜谿、伏溜、石柱、蠡四川，東北流注之，左會臨

羌谿水。《水經注》

澍案《漢·地理志》：『臨羌西北至塞外，有西王母石室，僊海鹽池北則湟水所出，東至允吾入河。』

龍夷城，在臨羌新縣西三百一十里，王莽納西零之獻，以為西海郡，治

此城。《水經注》

澍案《前漢·地理志》引云：『臨羌西有卑和羌，即獻王莽地爲西海郡者也。』又案《寰宇記》：『龍夷城，漢西海郡，治石國，西北三百里，故契翁虜所治。』又案與姑臧縣西之龍夷城同名，彼是漢戍已校尉所治地，一名晏然城也。

西平、張掖之間，大月氏之別小月氏之國。《水經注》

澍案《後漢書》：『湟中月氏胡者，其王爲匈奴所殺，餘種分散，西踰蔥嶺，其弱者南入山，從羌居止，故受小月氏之名也。』一云：『大月氏本居敦煌、祁連閒，至冒頓單于攻破月氏，而老上單于殺月氏王，以其頭爲飲器，乃遠去。過大宛，西擊大夏而臣之，都媯水北爲王庭。其餘小衆不能去者，保南山羌，號

小月氏。』

西平亭北，有土樓，神祠者也。《水經注》

澍案《水經注》云：『湟水又東逕土樓南，樓北倚山，原峯高三百尺，有若削成，樓下有神祠，雕牆故壁存焉。』

金城，在西平西北六十里遠。《水經注》

澍案應劭云：『初築城得金，故曰金城。』薛瓚云：『金者，取其堅固也。故《墨子》有「金城湯池」之言。』

金城郡有金城關。《初學記》

澍案金城關，即河關，在縣西南，臨河。積石山，在西南羌中，河水行塞外，東

北入塞內，至章武入海。

金城河初與浩亶河合，又與勒且河合，者也。《水經注》

澍案酈道元曰：「湟水又東，勒且谿水注之。水出安誇縣東南，勒且谿北流，逕安誇城東而北入湟水。湟水有勒且之名，疑即此號也。」

黃河至金城縣，謂之金城河，隨地爲名也。《水經注》

澍案湟水東流注於金城河，即積石之黃河也。

大河在金城北門東流，有梁泉注之，出縣之南山。《水經注》

澍案酈道元曰：「案耆舊言梁暉，字始娥，漢大將軍梁冀後。冀誅，入羌後其祖父爲羌所推爲渠帥，而居此城。土荒民亂，暉將移居枹罕，出頓此山，爲

羣羌圍迫，無水，暉以所執榆鞭豎地，以青羊祈山神，泉涌出，榆木成林，其水自縣北流注于河也。』

安夷縣故城，城有東西門，在西平亭東四十里。《水經注》

澍案：酈道元以爲七十里，湟水東逕安夷縣故城也。

延壽縣，在酒泉郡西，金山在其東，至玉石障，是亦漢遮虜障也。《太平寰宇記》

澍案遮虜障，路博德築。李陵敗，與士衆期至遮虜，即此。延壽城中有山，出泉注池，其水肥如肉汁，然之如油，極明，但不可食，此方人謂之石漆，得

火愈熾。《九州要記》：『金山有赤彈水，堪爲漆用。』

長寧亭北有養女嶺，即浩亶山，西平之北山也。《水經注》

澍案一引作『浩亶之西山，西平之北山也』。又案酈道元云：『養女北山有二源，皆長湍遠發，南總一川，逕養女山，謂之養女川。』

養女川，亂流出峽南，逕長寧亭東。城有東西門，東北隅有金城，在西平西北六十里。《太平御覽》

澍案《水經注》文與此同，不曰《十三州志》。惟『六十里』作『四十里』云。《十三州志》曰『六十里』，遠矣。是酈氏本玄陰說也。

鹿塞，在蒼松縣南十里是也。《初學記》

澍案蒼松屬武威郡南山松，陝水所出，北至搆次入海。《十六國春秋》：『後涼呂光麟嘉四年以郭鑿識言，改爲昌松縣。』

秦州，青水縣秦亭秦谷是也。周太史儋曰：『始周與秦國合而別，故天子邑之秦。』《括地志》

澍案《玉海》引『秦亭秦谷』四字。

居延縣，屬張掖郡。居延澤在東北。武帝使伏波將軍路博德築遮虜障於

居延城。《太平御覽》《後漢書注》

澍案居延澤，古文以爲流沙黑水，出縣界雞山，亦名玄圃。有娥氏女簡狄浴于系丘之水，即黑水也。

平帝時，金城塞外羌獻地，以爲西海郡。光武建武中，省金城入隴西郡，至是復繕修之。《後漢書注》

澍案前涼張軌置爲廣武郡，至張駿分立武始郡。西秦乞伏乾歸自苑川，徙都南涼，禿髮烏孤都廣武，皆此地。後魏、後周并爲武始郡。隋開皇九年，廢郡，立爲蘭州，取皋蘭山以爲名。

涼州姑臧縣東南有鷓陰，縣故城，因水以爲名。《後漢書注》

澍案王隱《晉書》：『此城匈奴所築，名蓋藏城，後人語訛爲姑臧城。一名卧龍城，又名鸞鳥城，又名翅城。』《寰宇記》：『鷓陰城在縣東。鷓，水名，俗名正陰城。』

武威郡故城，在今涼州姑臧縣西北，故涼城是也。《後漢書注》

澍案《九州要記》：『涼州古武威郡有天山，黃帝受金液神丹于此。』

略陽道，在天水郡東六十里，即古冀城也。魏黃初中，改爲隴城，以縣隸之。八年，廢文州縣來屬。《太平寰宇記》

澍案《郡國志》：『略陽道屬漢陽郡，有街泉亭。』

廉縣，在富平北。自昔匈奴侵漢，新秦之士，率爲狄場，故城舊壁，盡

從胡目。《水經注》

澍案《地理志》：『北地有廉縣。』酈氏曰：『石門水逕廉城東。』

隴西西縣蟠冢山在西。西漢水所出，南入廣魏白水。《水經注》

澍案《前漢·地理志》：『東南至江州入江，過郡四，行二千七百六十里。』

漾水出獬道，東至武都入漢。《水經注》

澍案酈道元曰：『許慎、呂忱并言漾水出隴西獬道，東至武都爲漢水，不言氏道。然獬道在冀之西北，又隔諸川，無水南入，疑出獬道之爲謬矣。』

漢，漾也，東爲滄浪水。《山海經》曰：『蟠冢之山，漢水出焉，而東南流，注於江。然東西兩川，俱出蟠冢，而同爲漢水者也。』孔安國曰：『泉始出爲漾，其猶濛耳。』而常璩專爲漾山漾水，當是作者附而爲山水之殊目矣。《水經注》

澍案酈道元曰：『余案《山海經》，漾水出崑崙西北隅而南流，注於醜塗之水。《穆天子傳》曰：「天子自春山西征，至於赤烏氏。己卯，北征。庚辰，濟於洋水。辛巳，入於曹奴。曹奴人戲觴天子於洋水之上，然川流隱伏，卒難詳照，地理潛閔，變通無方，復不可全言闕氏之非也。』

懸泉水，一名神泉，在酒泉縣東一百三十里，出龍勒山腹。漢貳師將軍李廣利伐大宛還，士衆渴，乏水，廣利乃引佩刀刺山，飛泉涌出，三軍賴以獲濟。今有祠甚嚴，郡侯歲謁。《太平寰宇記》

岷山無草木，其西有天女神。洮水經其下，即夏禹見長人受黑玉書處。《太

平御覽》

疆水，出陰平西北疆山，一曰疆川。《水經注》

澍案洮水源出西傾山東，亦曰疆臺山，墊江水亦出此山南也。

會水，衆羌之水所會，故曰會水。北有白亭，俗因謂之白亭水。《太平寰宇記》

澍案《漢·地理志》引云：『會水，衆水所會，故曰會水。』

漢或爲漾，漾水出崑崙西北隅，至氐道，重源顯發而爲漾水。《水經注》

安陵，本周之程邑也。《漢·地理志》

澍案《國名紀》：『商封吳回後於程。』一云：『程伯休父，卿士之采。』

岐山縣，以郡縣道里數，即隴州杜陽故城。《路史》

扶風郡，道里數即隴州，杜陽故城近之。《太平寰宇記》

澍案《毛詩譜》云：『周原者，岐山陽地，屬杜陽地，形險阻而原田肥美。』

安陵，《戰國策》『秦昭王欲易地』，即此。《水經注》

澍案酈道元曰：『世祖建武十一年，以封中郎將來歙。歙以徵定西羌功，故更名徵羌也。闕氏謂易地，非也。』

召陵，召者，高也。其地丘墟，井深數丈，故以名焉。《水經注》

澍案《水經注》：『召陵城內有大井，徑數丈，水至清深。』

渭水至崑陰，洛水入焉，即漆沮之水也。《水經注》

澍案《水經》云：『渭水東過崑陰縣北，注洛水入焉，闕駟以爲漆沮之水也。』

四面積高曰『雍』。雍有五時祠，以上祠祀五帝。昔秦文公田於汧渭之間，夢黃蛇自天下屬地，其口止於鄜衍，以爲上帝之神，於是作鄜時，祀白帝。秦宣公作密時於渭南，祀青帝。靈公於吳陽作上時，祀黃帝；作下時，祀炎帝焉。獻公作畦時於櫟陽，而祠白帝。漢高帝問曰：『天有五帝，今四何也。』博士莫

知其故。帝曰：『我知之矣，待我而五。』遂立北時，祀黑帝。宜爲神明之隩，故立羣祠焉。《水經注》

澍案《水經注》止引末二句。

橋水北流注於渭，世謂之新鄭水。《水經注》

新鄭水，逕鄭城西，水上有橋，東去鄭城十里，北流注於渭。

澍案《水經注》云：『橋水北流注於渭，闕駟謂之新鄭水，今以意補。』

西鄭，鄭桓友之所封。《水經注》

澍案酈道元曰：『史記秦武公十年縣之，鄭桓公友之故邑也。』《漢書》薛

瓚注言：『周自穆王已下，都於新鄭，不得以封桓公也。幽王既敗，虢檜又滅，遷

居其地，國於鄭父之丘，是爲鄭桓公。無封京兆之文。』余案馬遷《史記》，考《春秋》《國語》《世本》言，周宣王二十二年，封庶弟友於鄭；又《春秋》《國語》并言桓公爲周司徒，以王室將亂，謀於史伯，而寄帑與賄於虢檜之間。幽王賈於戲，鄭桓公死之。平王東遷，鄭武公輔王室，滅虢檜而兼其土，故周桓公言於王曰：『我周之東遷，晉鄭是依，乃遷封於彼。』《左傳·隱公》十一年，鄭伯謂公孫獲曰：『吾先君新邑於此，其能與許爭乎？』是指新鄭爲言矣。然班固、應劭、鄭玄、皇甫謐、裴頠、王隱、闕駟及諸述作者，咸以西鄭爲友之始封，賢於薛瓚之單說也。

歷城，本周之甘泉西地。《初學記》

汧水，出汧縣西北，亦謂之龍魚水。《水經注》

澍案汧水東北流，歷澗注以成淵潭，漲不測。出五色魚，俗以爲靈，而莫敢採捕，因謂是水爲龍魚水。

潼關因水得名，水去關一里。《左傳》：『晉侯使大夫詹嘉處瑕，以守桃林之塞，即此。』《太平寰宇記》

長蛇水，出汧縣之數歷山，南流逕長蛇戍東。魏和平三年築，徙諸流民，以遏隴寇。楚水南注於渭，即汧水也。

澍案酈道元曰：『闕駟以是水爲汧水焉。』是《十三州志》原文與《水經注》相同也，今以意補。

漆水，出漆縣西北，至岐山東入渭。《地理志注》《水經注》

澍案《禹貢正義》引末云：「沮則不知所出。」又案《水經注》云：「今有水出杜陽縣岐山北漆谿，謂之漆渠。」

契居蕃，蕃在鄭西，今之巒城是矣。地有商山，即商州上洛也。《路史》

澍案《水經注》引云：「蕃邑在鄭縣西。」

契封商，即上洛商縣也。《水經注》

釐，古文作『台』。《漢·地理志》

澍案釐城，一名武功。周爲郃國，後稷所封之地。桓譚《新論》曰：「郃在漆鄉。其民有會日，以相與夜中市，如不爲則有災咎。」

梁即周南鄭邑。《路史注》

澍案今《太平寰宇記》引云：『梁即周南鄙邑也。』『鄙』字訛。又案《郡國縣道記》云：『梁縣西南十五里有古梁城。』

御宿苑有含消梨，人間往往有之。《括地志》

澍案《三秦記》：『漢武帝園，一名樊川，一名御宿。有大梨如五升瓶，落地則破，其主取布囊承之。』

蘭池陂，即古之蘭池，在咸陽界。始皇都長安，引渭水爲池，築爲蓬瀛，刻石爲鯨，長二百丈，逢盜之處也。《括地志》

沔水，一曰沮水。以其初出沮洳，故曰沮水。縣亦受名焉。《水經注》

萬年縣南有涇渭，北有小河，即沮水也。《地理志注》《括地志》

秦長城，在蒲城東五十里。秦築長城，即是塹洛也。《太平寰宇記》

澍案高誘曰：『桃林縣西長城是也，即此長城。』

蓮勺，縣以草受名也。《水經注》

澍案沮水東逕蓮勺縣故城。顏師古云：『音輦酌。』如淳曰：『蓮勺縣有

鹽池，縱廣十餘里。』

霸陵，秦襄王所葬芷陽也。漢文帝更名霸陵。莽曰：『水章。』宋敏求《長安志》。

笄頭山，在潘城南。《水經注》

澍案《魏土地記》云：『下洛城西南九十里有協陽關，關道西通代郡。其

水東北流，歷笄頭山。』又云：『下洛城西南四十里有潘城，城西北三里有歷山，山上有虞舜廟。』

山陽有東緡縣，鄒衍曰：『余登緡城以望宋都者也。』後漢世祖建武十一年，封馮異長子璋為侯國。《水經注》

澍案東緡，故宋國。《春秋》僖公二十三年，齊侯伐宋圍緡。

廣川縣中有長河為流，故曰廣川也。水側有羌壘，姚氏之故居也。《水經注》《地理志》

理志》

澍案應劭曰：『廣川縣西北三十里有歷城亭。』又案廣川縣在信都。隋仁壽元年初，立煬帝為太子，避諱改長河縣。

三戶，鄴北五十里，梁淇故縣。《索隱》

澍案張晏曰：『三戶，地名。在梁淇西南。』《水經注》云：『漳水東逕

三戶峽爲三戶津。』《索隱》云『淇』當爲『湛』。案《晉八王故事》云：『王

駿伐鄴，前至梁湛。』孟康曰：『在鄴西四十里。』今闕氏作『淇』字，又不同。

女陽，本汝水別流，其後枯竭，號曰死女水，故其字無水。《水經注》

澍案《述征記》，齊人諺曰：『世治則女水流，世亂則女水竭。慕容超時，乾

涸彌載，及宋武北征，乃激洪流。』

今成武縣東南有郟城，謂之北郟者也。《水經注》

澍案《太平御覽》引云：『郟城，俗謂之北郟。』

昌水，其勢平博，故曰博昌。後漢改千乘郡爲樂安郡，博昌縣仍屬焉。《太

平寰宇記》

澍案《水經注》引云：「博昌縣處勢平，故曰博昌。」又案應劭云：「昌水出東萊昌陽縣。」

周成王時，薄姑與四國作亂，周公滅之，以封太公。是以《地理志》曰：「或言薄姑也。」王莽曰季睦矣。《水經注》

澍案薄姑，亦作蒲姑，古字通。薛瓚《漢書注》云：「博昌有薄姑城。」

陽樂縣，在當利縣東北二十里。又當利縣東有陵石城。《太平寰宇記》

澍案《樂史》云：「陽樂，在今萊州西南二十里內。」又云：「「陵」爲「陽」

字之訛。漢成帝封膠東共王子慶爲陽石侯。』

貫城，在蒙縣西北。《春秋·僖公二年》：齊侯、宋公、江黃盟於貫，杜預以爲「貫」也，「貫」「貫」字相似，貫在齊謂貫澤是也。《水經注》

澍案《水經注》云：「今於此地更無他城，在蒙西北惟是邑耳。考文準義，貫邑明矣。」

壽張有蚩尤祠。《水經注》

澍案《皇覽》云：「蚩尤冢，在東郡壽張縣鬪鄉城中，冢高七尺，常以十月祠之，有赤氣出如絳，民名爲蚩尤旗。」

蚩尤肩髀冢重聚，大小與鬪冢等。傳言蚩尤與黃帝戰，克之於涿鹿之野，身

體異處，故別葬焉。《太平御覽》《太平寰宇記》

澍案《皇覽》云：『蚩尤冢，在東平郡壽張縣闕鄉城中。』即《封禪書》所云在東平陸監鄉也。監，《索隱》音「闕」。

劇陽縣，在陰館縣東北一百三里。《水經注》

澍案崞川水，在其縣東注灤水也。

朱虛故城，在青州臨朐縣東六十里。丹朱游故虛，故曰朱虛。《括地志》

朱虛東十三里有校亭祠。《太平寰宇記》

澍案《北堂書鈔》注引云：『朱虛縣東三十里有校亭故縣也。』

牟平縣，在黃縣南百三十里，即古腫縣也。《括地志》

澍案《史記》注：『東萊有黃縣、腫縣。』

山陽南平陽縣有閭丘鄉。《太平御覽》《水經注》

澍案《左傳》杜預注：『平陽北有顯閭亭。』《從征記》曰：『杜謂顯閭，閭丘也。』酈道元云：『漆鄉東北有閭丘鄉，非顯閭也。』

饒安縣東南二十里有童鄉亭，即故章縣。「童」字類「章」。章縣蓋在縣東南二十里童鄉亭。《太平寰宇記》

澍案饒安本漢千童縣，屬渤海郡，後漢改爲饒安縣。

平陵城，在歷城縣東十五里。案《三齊記》：『高唐縣西南三十里有平陵城，殷帝乙所都也。東平陵縣，屬濟南郡，宋改爲平陵縣。本東陵，後改爲平陵。』

《太平寰宇記》

古高唐城，在禹城南五十里。《春秋·襄公十九年》：『齊夙沙衛奔高唐以叛』。杜預注云：『高唐，在祝阿縣西北，此則古爲齊邑也。』《漢書·地理志》：『平原郡有高唐，則漢縣也，即齊威王使盼子治高唐之地。漢古縣在平原郡南五十里。』《太平寰宇記》

澍案《路史》引云：『高唐各邑漢縣。平原郡南五十里有高唐縣。』

青州平原國，和帝延平九年以封子懷王勝，風俗與舊齊同。然吏奸倍於民，給衛士吏賦狐肉，稍從假錢，積至萬餘，歲竟交代，更無償意。衛士恨恙，取狐肉沃以酒，從而呪之曰：『狐肉狐肉，尾斯尾斯，身軀雖小，私之！』吏聞

之恐，乃償之錢。《太平御覽》

東安平，博陵有安平，故此加東。《地理志》

澍案有菟頭山，女水出東北，至臨留入鉅定。孟康云：『紀季以鄆入于齊，今鄆亭是也。』

漆鄉，邾邑也。《水經注》

澍案杜預曰：『平陽東北有漆鄉。』又案《水經注》引作應劭《十三州記》，即《地理風俗記》也。

即丘，即祝魯之音，蓋字承讀變矣。《水經注》

澍案漢東海郡即丘，故《春秋》之祝丘也。

太山萊蕪縣，魯之萊柞邑。《水經注》

澍案《左傳》：『季孫以桃邑與孟氏易成還杞，謝息辭以無山，與之萊柞。』

魯有東西二鄆，文十二年，季孫行父城諸及鄆。《太平寰宇記》

澍案杜注：『鄆、莒，魯所爭者。城陽姑幕縣南有員亭，員即鄆。此魯

之東鄆也。』成十六年，晉人執季孫行父於莒丘，公還待於鄆。杜《注》：『魯

西邑，東郡廩丘縣東有鄆城，此魯之西鄆也。』

浮陽縣，浮陽水所出，東入海。《太平御覽》

澍案應劭云：『浮陽縣，浮水所出，入海，潮汐往來日再，與玄陰說合。《樂

史》引云：『浮陽縣，浮水所出，東入海。』

高堂縣有爵堤，以捍河水。《太平寰宇記》

澍案黃河在高堂縣東四十五里。

海曲，在琅邪開陽縣一百三十里，蓋在懷仁縣西界，與臨沂接境，漢故利城側近是也。《太平寰宇記》

澍案懷仁縣，本漢贛榆縣地。開陽縣，即《春秋》邶國，《左傳》作啟陽。

澗水，《禹貢》之淵水。《水經注》

澍案劉澄之曰：『新安有澗水，源出縣北；又有淵水，未知其源。』酈道

元云：『考諸地記，並無淵水，但「淵」、「澗」字相似，時有字錯爲「淵」也。』

故闕駟《地理志》云：『《禹貢》之淵水，是知傳寫繆舛也。』

軹縣南山西曲有故向城，即周向國也。《傳》曰：『向姜不安於莒而歸者矣。』《水經注》

澍案《路史》引云：『軹縣南山西曲有故向城，即周之向國也。』又案《竹書紀年》曰：『鄭侯使韓辰歸晉陽及向。二月，城陽、向，更名陽爲河雍，向爲高平，即是城也。』

濮渠水，首受別濟，即北濟也。其故瀆自濟東北流，左迤爲高梁陂，陂爲方三里。濮水又東逕匡城。孔子去衛適陳，過難於匡者也。《水經注》

《禹貢》，被孟豬。孟豬，在睢陽縣之東北。不言人而言被者，明不常人也，水盛方乃覆被矣。《水經注》

闕與，今梁榆城是也。漢高帝八年，封馮解散爲侯國。《水經注》

三塗山，在陸渾東南。《水經注》

澍案杜預《釋地》曰：『山在縣南。』酈道元曰：『山在陸渾故城東南八十許里。』服虔曰：『三塗、大行、轘轅、嶠澗也。』

酈道元曰：『或言宜爲轘轅、大谷、伊闕。』

薄城，即貫城，在蒙縣西北。《水經注》

蒙澤，在已氏縣東。《春秋·莊公十二年》：『宋萬與公爭博，殺閔公於斯澤。』

《水經注》

澍案獲水逕已氏縣南南流，逕於蒙澤。

景亳，湯都也，亳本帝嚳之墟，在《禹貢》豫州河洛之間，今河南偃師城西二十里尸鄉亭是也。《水經注》

澍案皇甫謐以為考之事實，學者失之。如孟子之言湯居亳，與葛為鄰，是即亳與葛比也。湯地七十里，葛又伯耳，封域有限，而寧陵去偃師八百里，不得童子饋餉而為之耕。今梁國有二亳，南亳在穀，北亳在蒙，非偃師也。古文《仲虺之誥》：『葛伯仇餉，征自葛始，即《孟子》之言是也。』

梁國有二亳，南亳在穀，北亳在蒙。湯會諸侯於北亳，即蒙之北亳也。《太

平寰宇記》

熟城，漢之縣名。在虞城縣西四十里。《太平寰宇記》

鄆，讀若礲确。《太平御覽》

澍案《後漢書注》：「鄆，縣名，今趙州高邑縣也。鄆，音火各反。」

濟水，西至湖陸入泗也。《水經注》

澍案酈道元曰：「濟在湖陸西，而左注泗，泗、濟合流，故《地記》或言濟入泗，泗亦言入濟，互交通稱矣。」

濟水自武德入河。《水經注》

澍案此濟水，陂水也。值武德縣南，至滎陽縣北東南流，入於河。酈道元曰：「先儒咸謂是溝爲濟渠，蓋濟水枝瀆，條分所在布稱，亦兼丹水之目矣。」

滎播，澤名也。《水經注》

澍案《晉地道志》云：「濟自大伾入河，與河水鬥，南洑爲滎澤。」呂忱曰：「播水在滎陽。」

武父城，在濟陽縣西北，鄭邑也。《水經注》

澍案《陳雷風俗傳》曰：「濟陽縣，故宋地也。」《竹書紀年》：「梁惠成王三十年，城濟陽。」

復陽縣，胡陽之樂鄉也。宣帝元康元年置，在桐柏大復山之陽，故曰復陽也。《水經注》

義陽郡，晉太始中，割南陽東鄙之安昌、平林、平氏、義陽四縣，置義陽郡於安昌城。《水經注》

澍案酈道元云：『義陽郡，世謂之白茅城，其城圓而不方。』

太子建所居城父，謂今亳州城父縣也。《史記正義》

澍案《括地志》引云：『亳州城父縣，太子建所居城父也。』張守節曰：『今

亳州見有城父縣，是建所守者。』《地理志》云：『潁川有父城縣，沛郡有城

父縣，此二名別耳。』服虔曰：『城父，楚北境，乃是父城之名，非建所守。』

富陂縣，漢和帝永元九年，分汝陰置。多陂塘以灌稻，故曰富陂縣也。《水

經注》

澍案《漢·地理志》：『汝南有富陂縣。建武二年，世祖改封平鄉侯王霸

爲富陂侯。』

魯山魯陽縣，今其地魯山是也。水南注於澧。澧水東逕應城南，故應鄉也，應侯之國。《詩》所謂應侯順德者也。《水經注》

魯陽縣有湯水，可以療疾。湯側又有寒泉焉，地勢不殊，而炎涼異致，雖隆火盛日，肅若冰谷矣。《水經注》

波水東北至定陵入汝。《水經注》

澍案應劭云：『孤山，波水所出也。』馬融《廣成頌》曰：『浸以波澆。』

酈道元曰：『波水，本分三川，於白亭東而俱南入澧水。』

夏水，出沛國城父東，至此合爲肥。《水經注》

澍案應劭曰：『夏水，出城父東南，至此與肥合，故曰合肥。』酈道元

云：『川殊派別，無沿注之理。應、闕二說，非實證也，蓋夏水暴長，旋合於肥，故曰合肥也。』

新汲，本汲鄉也，宣帝神爵三年置。以河內有汲，故加新也。《漢·地理志》

泗水，漢興四年，改泗水為沛郡，理相城，故以沛為小沛。《史記正義》

澍案《地理志》：『泗水國，故東海郡。武帝元鼎四年，別為泗水國。』

北利城，在上蔡。《初學記》

豫州有羊澗。漢武帝時，有白羊出谿澗中。《初學記》

澍案《郡國志》：『吳房堂谿有白羊淵，淵水舊出山羊。漢武元封二年，有白羊出此淵，畜牧者禱祀之。初出一羊，婦人大驚拍手，羊自此絕焉，即指

此澗也。』

弘農有桃丘聚。《北堂書鈔》

澍案或引作應劭《十三州記》。

頓丘，在淇水南，又屈逕頓丘西，又北屈而西轉，逕頓丘北。《玉海》

澍案《水經注》引云：『頓丘，在淇水南，又屈逕頓丘西。』近人戴東原以『又屈逕頓丘西』六字爲衍文，誤矣。《尔疋》曰：『山一成謂之頓丘。』《釋名》謂

『一頓而成丘，無高下小大之殺也』。《詩》所謂送子涉淇，至於頓丘者也。

輶轅道，凡十二曲也。今^{一有案字}在緱氏縣東南。《初學記》

澍案《括地志》引云：『輶轅道凡十二曲，是險道。』

穀城，在平津大河之南。魏文帝改曰河陰。《括地志》

亳城縣，漢武帝分穀熟置。《春秋·莊公十二年》：『宋公子御說奔亳者也。』

《水經注》

京師之州，司隸校尉掌焉，故曰司州。晉受禪，又都洛陽，司州不改。永嘉五年，劉曜王彌入京師，於是司州沒胡，劉聰以洛陽爲荊州。石季龍又改爲司州。建武元年，分司州之河南等七郡爲洛州。東晉永和五年，桓元子入洛陽，復置河南郡屬司州。苻堅使王猛克洛陽，改司州爲豫州。後秦不改。宋武帝入洛，更置東垣、西垣二縣，仍於虎牢置司州。後魏神麴三年，遣將安頡攻洛陽，拔之，復爲洛州。太和十七年，又改洛州爲司州。十九年，改河

南郡爲河南尹。孝武帝自洛陽遷都長安，是爲西魏。孝景帝自洛陽徙都鄴，是爲東魏。《太平寰宇記》

朝歌，紂都。其俗歌謠，男女淫縱，猶有紂之餘風存焉。《太平寰宇記》

共山，在共城縣北十里。共伯復歸於國，逍遙得意，游共山之首。《太平寰宇記》

共城縣，本共伯國也。故城在縣東一百十步，尚存。魯連子云：共伯名和，好行仁義，諸侯賢之。周厲王無道，國人作亂，流王於彘，諸侯奉和以行天子事。至十四年，厲王崩於彘，共伯使諸侯奉王子靖爲宣王，而共伯復歸於國。《太平寰宇記》

共縣，即共和之故國也。共伯既歸帝政，逍遙於共山之上。山在國北，所謂北共山也。

澍案《水經注》，不云是《十三州志》，《御覽》引此爲《十三州志》。

澶水，在頓丘西南三十里，伏流至繁城西南。《太平寰宇記》

澍案澶淵，在臨河縣東南十七里，在黎州東北八十里。澶水，即澶淵也。一名繁淵，有繁泉。見《寰宇記》

博陵郡，本初元年，一作十，誤。蠡吾侯志入繼孝質，是爲孝桓帝。追尊皇考

蠡吾侯翼爲孝崇皇帝，陵曰博陵，因以爲郡。晉於此立博陵國。後魏宣武帝

景明元年，改博陵爲博野，以地居博水之野。故名。《太平寰宇記》

澍案《後漢郡國志》曰：『中山國，蠡吾侯國，故屬涿。』胡三省注《通

鑑》曰：『博陵，本蠡吾縣地，皆無分置博陵郡語，此云置郡，未詳所據。』

又案《御覽》引末句，因改爲博陵縣，無『因以爲郡』四字。

南頓西三十里，故頓子城，在潁水之南，故號潁陰城。《路史》

澍案《寰宇記》引無上一句，『號』作『爲』。又案應劭云：『迫於陳南徙，曰南頓。』

戰國時，梁屬魏。秦置三十六郡，屬三川郡。漢爲河南郡之梁縣也。《太平御覽》

武父城，在濟陽縣西北，鄭邑也。《水經注》

澍案《杜注》：『陳畱濟陽縣東有武父城。』

天王狩於河陽。河陽別縣，非温邑也。漢高帝六年，封陳涓爲侯國，王莽之河亭也。治河，上河孟津河也。《水經注》

澍案服虔、賈逵曰：『河陽温也。而班固、司馬彪、袁山松《晉太康地道志》皆與闕氏說同。蓋河陽故城在今孟縣西三十五里，温故城在今温縣西南三十里。』郭緣生《述征記》曰：『踐土，今冶坂城。』酈氏云：『是名異《春秋》焉，非也。今河北見者河陽城，故縣也，在冶坂西北，蓋晉之温地，故羣儒有温之論矣。』

張甲河，東北至修縣入清漳。《水經注》

澍案《地理志》：『張甲河，首受屯氏別河于信成縣。』酈氏曰：『張甲故瀆，又東北至修縣東會清河。』

鳴犢河，東北至修入屯氏。《水經注》

澍案《地理志》：『河水自靈縣別出爲鳴犢河。』《水經注》云：『東北逕靈縣東，東入鄆縣，而北合屯氏瀆，屯氏瀆，兼鳴犢之稱也。』又案隋時誤以爲毛氏河，乃置毛州。

山民城北爲高榆淵。又東北醋溝水出焉，水在中牟。《水經注》

澍案《竹書紀年》：『梁惠成王十六年，秦公孫壯率師城上枳、安陵、山民者也。』《水經注》云：『又東北爲酢溝。』《續述征記》：『醬魁城到酢溝十里。』榆，一作『踰』。

盧氏有朱陽山，因別立縣。後魏太和十四年，蠻人樊磨背梁歸魏，魏於今盧氏縣南百五十里立朱陽郡，以樊磨爲太守。孝昌二年，省郡。大統二年，又

立，屬東義州，仍於治所置朱陽縣以屬焉。《太平寰宇記》

澍案《開山圖》曰：『盧氏宜五穀，可避水災，亦通謂之石城山。』

三封縣故城，在臨戎縣西百四十里，漢武帝元狩三年置。《水經注》

澍案酈氏云：『河水東北逕三封故城，東臨戎。漢元朔五年，立舊朔方郡，治王莽之所謂推武也。』

窳渾縣有大道，西北出雞鹿塞。窳，音羊主反。《後漢書注》

澍案《水經注》：『河水北迤，西溢於窳渾縣故城東。漢武帝元朔二年，開朔方郡縣，即西部都尉治，有道自縣西北出雞鹿塞。王莽更郡曰溝搜，縣曰極武。其水積而為屠申澤，闕駟謂之窳渾澤矣。又案《漢書注》所引《十三州

志》與《水經注》同。是《水經注》即本《十三州志》爲文也，屠申澤改爲麻渾澤，即是玄陰原文矣。

屠申澤，今謂之麻渾澤。《水經注》

澍案《漢·地理志》：「麻渾有道西北出雞鹿塞，屠申澤在其東。」

原亭城，中部都尉治。《水經注》

澍案酈氏云：「河水又東逕原亭城南。」又案原亭屬九原郡。《漢·地理志》：「原亭作原高，中部都尉治，西部都尉治，田辟有鹽官。」

宜梁縣故城，在五原西南六十里，今世謂之石崖城。《水經注》

澍案酈道元云：「河水東逕宜梁縣之故城南。」

北輿縣，廣陵有輿，故此加北。《水經注》

澍案《地理志》：『五原郡有南輿縣，中部都尉治，故此加北。』道元以闕氏之言廣陵，疑太疏遠。又案輿，《漢·地理志》屬臨淮，後漢屬廣陵。

首陽山，一名獨頭山，夷齊所隱也。山南有古冢，陵柏蔚然，攢茂丘阜，俗謂之夷齊墓也。《水經注》

澍案雷首山與蒲坂分山有夷齊廟。涑水西南流，亦曰雷水。

楊氏縣北四十里，有敬武亭，故縣也。《水經注》

楊氏縣，在魏郡北地。《漢書注》

澍案楊氏屬鉅鹿郡。

武州縣，在善無城西南百五十里。北俗謂之太羅城，水亦藉稱焉。《水經注》

澍案《寰宇記》作『武周』。《圖經》云：『武周山，在朔州郡西北，是縣因山爲名也。』

善無縣南七十五里有中陵縣，世祖建武二十五年置。《水經注》《太平御覽》

澍案《水經注》云：『中陵縣北，俗謂之北右突城，王莽之遮害也。』

善無縣故城，王莽之陰館，舊定襄郡治。《水經注》

澍案《地理志》：『陰館縣，屬雁門郡。』

蒲城在離石西北，漢武帝置。《水經注》

澍案蒲城，即重耳所奔之處也。徐廣《晉紀》稱劉淵自離石南移蒲子。

蒲坂，堯都。《水經注》

澍案皇甫謐曰：『蒲坂，舜所都。或言平陽及潘者也。』闕氏以爲堯都，未詳所據。《地理志》曰：『縣有堯山首山祠，雷首山在南。』《竹書紀年》：『魏襄王七年，秦王來見于蒲坂關。』

富平，明帝永平五年改曰厭次。厭次縣，本富平侯車騎將軍張安世之封邑。《水經注》

澍案酈道元曰：『案《漢書》，昭帝元鳳六年，封右將軍張安世爲富平侯。薨，子延壽嗣。國在陳畱，別邑在魏郡。』《陳畱風俗傳》曰：『陳畱尉氏縣安陵鄉，故富平縣也。是乃安世所食矣，歲入租千餘萬。延壽自以身無

功德，何堪久居先人大國，上書請減戶，天子以爲有讓，徙封平原，并食一邑，戶口如故，而減稅半。」

汾水，出武州之燕京山，亦一作蓋管涔之異名也。《初學記》

澍案《御覽》引云：『其山重阜修層，有草無木，衆源導於南麓之下。』

州，《御覽》作『周』，誤。

大行山，或曰孟門，蓋甚險阨。《初學記》

澍案大行山，即五行之異名也。《淮南子》曰：『武王欲築宮於五行之山。』

周公曰：『五行險固，德能覆也。內貢迴矣，使吾暴亂，則伐我難矣，君子以爲能持滿。』高誘云：『今大行山也，在河內野王縣西北上黨關。』

傅巖，在陝州河北縣界，今住穴猶存。《後漢書注》

澍案河北縣，一作太陽縣。『猶』作『尚』。

古平周縣，在汾州介休縣西五十里。《史記正義》

令狐，即猗氏也。刳首在西三十里，縣南對澤，即猗頓之故居也。《水經注》

澍案《春秋》文公七年，晉敗秦於令狐，至於刳首，先蔑奔秦，士會從之。又案一引云，『猗』音於『宜』反。

晉陽有羊腸蟠曲，在其西北九十里也。《太平御覽》

晉水出龍山，名結紉山，在晉陽縣西北。《水經注》

澍案《山海經》：『縣壅之山，晉水出焉。』《元和志》：『晉陽縣縣甕山，一

名龍山，在縣西南二里。』酈道元曰：『今在縣西南，云在西北，非也。』

絳水經鉅鹿縣東五十里有繚城故縣。左逕安城南，故信都之安城鄉也。更始二年，和戎卒正邳彤與上會信都南安城鄉，上大悅，即此處也。《水經注》

下曲陽中山，有上曲陽，故加下耳。《太平御覽》

澍案酈道元曰：『上曲陽縣，本岳牧朝宿之邑，城在山曲之陽，是曰曲陽。有下，故此爲上矣。』又案《漢書注》：『下曲陽，屬鉅鹿郡。常山郡有上曲陽也。』

平陸吳山上有虞城，舜始封。穆天子登薄山，寘軫之陞宿於虞，是也。《路史》

馬邑，昔秦人築城於武州塞內以備胡，城將成而崩者數矣。有馬馳走其地，周旋反覆，父老異之。因依以築城，城乃不崩，遂名之爲馬邑。其故城，今

朔州也。《太平御覽》

澍案干寶《搜神記》亦載此。《水經注》引《虞氏記》云：「趙武侯於河西造大城一箱，崩不就，乃改卜陰山河曲而禱焉。晝見羣鵠游於雲中，徘徊經日，見大光在其下，武侯曰：「此爲我乎？即於其處築城。今雲中城是也。」」《周地圖記》言張儀依龜行築成都，與此同。

塗山臺，塗山氏思本國，築以望之。基猶在夏城南安邑，俗名青臺，上有禹祠。縣東南五十五里中條山有望川，夏后避夏離宮之所。《路史注》

澍案《水經注》云：「安邑，禹都也。禹娶塗山氏女，思戀本國，築臺以望之。今城南門臺基猶存。」

夏禹臺，在夏縣西北十五里。其地禹娶塗山氏女，思本國，築臺以望。今城南門臺基猶存。夏靜與洛下人書云：『安邑塗山氏臺，謂之青臺，上有禹祠。』

《太平寰宇記》

扶柳縣東北有武陽城，故縣也。《水經注》

扶柳其地有扶澤，澤中多柳，故曰扶柳。《漢·地理志》

修水，出塞外柔元鎮西長川城南小山，俗謂是水爲河頭。又東南于大甯

郡北，右注雁門水。《水經注》

班氏縣，在代郡西南百里。北俗謂之去畱城也。《水經注》

澍案灤水，經班氏縣故城東。

平邑城，在高柳南百八十里。北俗謂之醜寅城。《水經注》

澍案灤水逕平邑縣故城南。趙獻侯十三年城平邑也，《地理志》屬代。又

案一引『北』字在『平』字上。

狝氏縣，在高柳南百三十里，俗謂之苦力千城矣。《水經注》

澍案狝氏，《地理志》音權精。又案灤水逕縣故城北。

道人城，在高柳東北八十里。《水經注》

澍案《地理風俗記》：『初築此城，有仙人游其地，故因目爲城名。』酈

氏云：『今城北有淵潭而不流，俗謂之爲平湖。』《地理志》：『王莽之道仁也。』

當城，當桓都城，故曰當城。《漢·地理志》

澍案《括地志》引云：『當城，在高柳東八十里，縣當常山，故曰當城。應劭云：『當桓都作城，故曰當城。』』

垣水至陽鄉注於桃。《水經注》

澍案酈道元曰：『垣水，世謂之南沙溝，即桃水也。逕涿縣與涿水合，世亦以涿水爲桃水。』又云：『桃水又東北與垣水會，水上承涑水，於良鄉縣分桃水，世謂之北沙溝。』應劭云：『垣水東入桃。』

侯水南入渝。《水經注》

澍案酈道元曰：『白狼水東流，分爲二水，右水疑即渝水也。』《地理志》云：『渝水首受白狼水，渝水南流東屈，與一水會合，世謂之榼，倫水之

變名耳。』疑即《地理志》所謂侯水北入渝者也。《地理志》又云：『渝水自塞外南入海。』

廣昌城，平舒城東九十里有廣平城，疑是城。《水經注》

潞縣有潞水，爲冀州浸，即漳水也。《水經注》

澍案《初學記》引云：『潞水出潞縣，冀州之浸。』《寰宇記》引云：『潞水在縣北，爲冀州浸，即漳水也。』

涿水縣在樂浪東北，鏤方縣在郡東。《水經注》

澍案酈道元曰：『蓋出其縣南逕鏤方也。』許慎曰：『涿水，出鏤方東入海。』一曰：『出涿水縣。』又案涿水，屬樂浪郡，水西至增地入海。師古曰：『涿

普大反。』

平舒城東九十里，有廣平城。《水經注》

澍案《地理志》：『祁夸水出平舒縣北，至桑乾入灤。』灤，一作『沽』。

廣平城東北百一十里有潘縣。《水經注》

澍案《路史》引云：『潘，在廣平城東北十里。』脫『百』字。《魏土地

記》曰：『下洛城西南四十里有潘城，城西北三里有歷山，山上有虞舜廟。又城有潘泉。』

南皮縣，章武有北皮亭，故此曰南皮也。王莽之迎河亭。《史記·惠景侯者年表》云：『漢景帝後七年，封孝文后兄子彭祖爲侯國，建安中，魏武禽袁

譚於此城也。」

《太平御覽》《漢·地理志》

澍案《地理風俗記》云：「南皮城北五十里有北皮城。」

望都，縣名，屬中山國，今定相縣也。章帝改曲逆爲蒲陰，亦屬中山，與望都相近，故城在今定相北。《後漢書注》

澍案張晏云：「堯山在北，堯母慶都在南，登堯山見都山，故以望都爲名。」

昌城縣，漢武帝以封城陽頃王子劉差爲侯國，本名阜城矣。《水經注》

直陽城，本鼓聚，晉荀吳滅鼓，以鳶鞮歸使涉佗守之。今其城昔陽亭是矣。《水

經注》

故安縣閭鄉，易水所出，至范陽入濡水。《水經注》

澍案高誘曰：『易水逕故安城南城外東流。』酈道元曰：『世又以易水爲故安河，易水東流而出於范陽東，與濡水合。』

南易水，逕縣南鄭縣故城北，東至文安縣與滹沱合。《水經注》

固安爲北易，滹沱爲南易。《路史注》

澍案酈道元曰：『北易至涿郡范陽縣合北濡，又并亂流入涑，逕容城至平舒，與易合。』又案與易合，與南易合也。

盧水出北平。《水經注》

澍案酈道元曰：『盧奴城內西北隅有水，淵而不流，南北百步，東西百餘步，水色正黑，俗名曰黑水池。或曰水黑曰盧，不流曰奴。』

涿郡，故燕，漢高帝六年置。其南有涿水郡蓋氏焉。《水經注》

涿郡南有涿水，北至上谷爲涿鹿河，其支流入匈奴中者謂之涿邪水。《太平

寰宇記》

澍案《御覽》『入匈奴中』者，引作『流塞外』三字。應劭云：『涿水，出

上谷涿鹿縣。』酈道元云：『涿水自涿鹿東注漯水，漯水東南逕廣陽郡，與涿郡分水。漢高祖六年，分燕置涿郡。』

涿鹿東北至上谷城六十里。《水經注》

澍案《魏土地記》曰：『城北有清夷水西流也。』

涿郡西界代之易水。《水經注》

澍案酈道元曰：『易水，出代郡廣昌縣東南郎山東北，燕王仙臺東。』又案此易即南易也。

馬城，在高柳東二百四十里，俗謂是水爲河頭，河頭出戎方，土俗變名。《水

經注》

澍案：修水逕馬城縣故城北。酈道元曰：『高柳在代中，其山重巒疊嶽，霞舉雲高，連山隱隱，東出遼塞，灤水東南流，逕高柳縣故城北。』

黃龍城，遼東蜀國，都尉治，昌遼道有黃龍亭。《水經注》

澍案《魏土地記》：『黃龍城西南有白狼河。』

轅陽，在上黨西北百八十里。《史記正義》

澍案轅陽，一引作『遼陽』。

大遼水，自塞外西南至安市入於海。《水經注》

燕太子丹遣荆軻刺秦王，與賓客知謀者祖道於易水上。燕丹子稱荆軻入秦，太子與知謀者皆素衣冠送之於易水之上。荆軻起爲壽，歌曰：『風蕭蕭兮易水寒，壯士一去兮不復還！高漸離擊築，宋如意和之，爲壯聲，士髮皆衝冠；爲哀聲，士皆流涕。』疑於此也。《水經注》

澍案《燕策》《史記》，俱無宋如意事，惟《淮南子》《韓非子》《宋玉》《筮賦》《陶淵明》《周弘直》《咏荆軻詩》，與此有之。一作『宋意』。

柏人城東北孤山，舜納於大麓，即此山。其上今猶有堯祠焉。世俗呼爲

宣務焉，或呼爲虛無山。《顏氏家訓》

平鄉縣，本秦鉅鹿郡也。鉅鹿，唐虞時大麓之地。《尚書》堯試舜，百揆納於大麓，麓則林之大者。堯之禪舜，欲使天下皆見之，故置諸侯，合羣臣與百姓，納之大麓之野，然後以天下授之，以明己禪公也。始皇二十五年，滅趙以爲鉅鹿郡，亦大稱也。《史記》曰：『張耳與趙王歇走入鉅鹿城，王離圍之。』即此地也。《太平寰宇記》

澍案《路史注》引云：『鉅鹿，唐虞時大麓也。堯試舜，百揆納於大麓，麓者林之大者也。堯亦使天下皆見之，故置諸侯，合羣臣與百姓，納之大麓之野，然後以天下授之，明己禪之公也。大陸縣有堯臺，高與城等，乃堯禪舜之處。始

皇二十五年，滅趙爲鉅鹿郡。』『縣』字句與樂史所引少異。又案《水經注》引應劭曰：『鹿者，林之大者也。』《尚書》曰：『堯將禪舜，納之大麓之野，烈風雷雨之迷，致之昭華之玉，而縣取目焉。』

巓嵒山上有堯祠，俗呼宣務山，謂舜宣務焉。或又云：『虛無也。』今在

柏人城東北，堯之納舜在是。《路史注》

斥丘縣屬鉅鹿郡故城，在今相州安成縣東南，土地斥鹵，故曰斥丘。《後漢書注》

澍案《水經注》引云：『斥丘，在魏郡東八十里。』又案斥丘，即應劭所云斥漳也。

代郡，東安陽五原有安陽，故此加東也。《漢·地理志》

代郡故城，

《寰宇記》引云：古代城在飛狐界。

盧植說。

一引有『異云』二字。

初置築時

一作郡

方就板幹，夜

自移西南五十里大澤中

《寰宇記》引，有『板幹』二字

自設結葦爲九門。於是就以爲城，周旋七

里。《初學記》

澍案《水經注》：『盧植言初築此城，板幹一夜自移於此，故代西南五十

里大澤中營城自護，結葦爲九門，於是就以爲治城。圓匝而不方，周四十七里，開

九門，更名其故城曰東城。』又案干寶《搜神記》云：『代城始築，立板幹，一

旦亡，西南板四十五里於澤中自立，結葦爲外門，因就營築焉。故其城周圓

三十五丈，爲九門，故城處呼之以爲東城。』

沙丘，秦王東巡回，死於沙丘。

《太平寰宇記》

冀州之地，蓋古京也。人患剽悍，故語曰：『仕宦不偶值，冀州部其人剛狠，淺於恩義，無賓序之禮，懷居慳嗇。古語云：幽冀之人鈍如錐，亦履山之險，爲逋逃之藪。』《太平寰宇記》

澍案《寰宇記》又引云：『黑山之險，爲逃逋幽藪。』又案：漢末，賊張燕等保聚此山。

渤海，風俗鷙戾，尚高氣力，輕爲奸宄。《太平寰宇記》

漢末大亂，匈奴侵邊，自定襄以西盡，雲中、雁門之間遂空。建安中，丞相曹公集荒郡之戶以爲縣，聚之九原界以立新興郡。領九原等縣，屬并州，即

此。《太平御覽》

平棘南有古平棘城，春秋之棘邑，戰國時改。《路史》

澍案漢初爲棘蒲，即《左傳》『師及齊師、衛圉、鮮虞人伐晉，取棘蒲者』，後改爲平棘。

真定，本名東垣，河東有垣縣，故此加東。《高帝紀》曰：『帝高祖十年，代相陳豨反。十一年，豨將趙利守東垣，高祖攻之不下，卒罵上。城降，卒罵者斬之。因改曰真定，屬恒山郡。武帝以爲真定國。後漢復爲縣，屬常山郡。』

《太平寰宇記》

靈壽縣，本中山國地。靈壽，中山桓公新都。《世本》又云：『中山武公居顧，桓公徙靈壽。』案中山武公本周之同姓，其後桓公不恤國政。晉太史餘

見周王，王問之：『諸侯孰先亡？』對曰：『中山之俗，以晝爲夜，淫昏康樂，以臣觀之，中山之君其先亡乎？』其後魏樂羊爲文侯將，攻拔中山，封之靈壽。《史記》『趙武靈王以惠文王三年滅中山，遷其君尚於膚施』，是也。《太平寰宇記》

蒲陰縣，漢章帝巡北岳，以曲逆名不善，改爲蒲陰縣。《太平寰宇記》

澍案隋《圖經》云：『漢高祖北征還，至此大會，酒酣，嘆曰：「吾行天下多矣，唯見此地與洛陽。」因封陳平于此。』

中山治盧奴。唐縣故城，在國北七十五里。《水經注》

澍案酈道元曰：『駟所說北，非也。』《史記》曰：『帝嚳氏沒，帝堯氏作，始封於唐。望都縣在南，今此城南對盧奴故城。』

漢北新城縣，《漢書·地理志》云：『燕南得涿郡之北新城，後漢屬中山國土地。河間有新城，故此加「北」字。後魏武帝永熙二年，於此置南營州，改爲新昌縣。』《太平寰宇記》

抒秋城，在蕭縣西七十里抒秋。光武封劉般爲抒秋侯，明帝以屬沛。《太平

寰宇記》

澍案：《御覽》引未有『抒音紓』三字。

鄆音多，在沛。漢封周應爲侯。《路史》

澍案《水經注》云：『陂水東逕鄆縣故城南。漢景帝中元年，封周應爲侯國。王莽更之曰單城也。音多，似是闕書原文。』

山桑縣人俗貪僞，好持馬鞭行邑，故語曰：『沛國龍亢至山桑，詐托旅使若奔喪，道遇寇鈔，遂失資糧。』《太平御覽》

山桑縣北城，在蒙城北三十七里。《輿地志》云：『山桑，漢舊縣，屬沛。光武封王常爲山桑侯，今城內有亭墓，陵阜高峻，山生於邑，其亭有桑，因爲縣名。』

《太平寰宇記》

澍案《水經注》云：『山桑故城，在渦水北，今城內東側。猶有山亭桀立，陵阜高峻，非洪臺所擬。』又案文欽亦封山桑侯。

江水至會稽與浙江合。《水經注》

澍案顧野王《玉篇》云：『浙江發源東陽、新安之間，不與岷山之江相涉，至

錢塘入於海。又案許慎、晉灼并言江水至山陰爲浙江，則所謂江水指浙江水也。『虞喜《志林》云：『今錢塘江口，浙江正居江中。潮水投山下，折而曲。』』
一云：『江有反濤，水勢折歸，故曰浙江。』

慎陽，本作滇從水。永平五年，失印更刻，遂誤以水爲心。《漢·地理志》

揚州後徙於陰陵。《太平寰宇記》

澍案《樂史》云：『今濠州定遠縣界陰陵故城是也。知漢末兼爲揚州，在吳時爲重鎮，晉爲淮南郡，東晉改爲歷陽郡。』

蘭陵，故魯次室邑。其後楚取之，改爲蘭陵縣，漢因之。《列女傳》曰：『魯次室女倚柱而歎曰「君老，太子幼」，諸女笑之，次室女曰「君老必愚，太子

幼必悖，愚悖之間，其亂必生，竟如其言。次室即此也。」

《太平寰宇記》

澗案即《列女傳》之「漆室」，一作次室。

武林山出錢水，東入海。《水經注》

澗案《吳地記》言縣惟浙江，今無此水。又案錢水，當即武林水也。

上虞縣有雁，爲民田春拔草根，秋啄除其穢。是以縣官禁民不得妄害此

鳥，犯則有刑無赦。《太平御覽》

澗案《水經注》：「會稽山上有禹冢。昔大禹即位十年，東巡狩，崩於會稽，因

而葬之。有鳥來爲之耘，春拔草根，秋啄其穢。是以縣官禁民不得妄害此鳥，犯

則刑無赦。即本玄陰之文爲說。」

百粵有駱田。《太平御覽》

澍案駱，音架，即架田，亦即葑田也。《廣州記》云：『交阯有駱田，仰潮水上下，人食其田，名爲駱侯。諸縣自名爲駱將，銅印青綬，即今之令。後蜀王子將兵討駱侯，自稱爲安陽王，治封谿縣。後南越王尉佗攻破安陽王，令二使典守交阯，九真二郡即甌駱也。』

仁山，在吉水縣東三十里。仁水，源出廢石陽縣側。《太平寰宇記》

澍案吉水，在縣東北十里，源出永新縣，東北會于贛水，古老傳云：『此水源出有波文，成「吉」字，亦如巴峽之水，屈曲成「巴」字也。』

句踐之地，南至句餘，其後并吳，因大城句餘，章伯功以示子孫，故曰

句章。《後漢書注》

澍案《後漢書注》云：『句章縣故城，在今越州鄞縣西。』

於替縣，本漢舊縣地，《漢志》屬丹陽郡。《吳越春秋》：『秦徙大越烏語

之人置替。』讀爲『潛』，出好布。吳寶鼎元年，割屬吳興郡。《吳錄地理志》：『縣

西替山，蓋因山以立名。』
《太平寰宇記》

澍案《樂史》云：『舊「替」字無水，至隋加水，屬餘杭郡。』

比景，『比』讀蔭庇之『庇』，景在己下，爲身所庇也。《太平御覽》

澍案如淳曰：『日中於頭上，景在己下，故名。』一引『爲』上有『言』字。

蜀之先，肇於人皇之際，至黃帝子昌意娶蜀山氏女，生帝嚳，後封其支

庶於蜀，歷夏、商、周，始稱王者。縱目名蠶叢，次曰魚鳧。其後有王曰杜宇，稱帝，號望帝。自以功德高諸王，

一引云：杜宇當七國稱王，獨杜宇稱帝於蜀。

乃以褒、斜爲前門，熊耳、靈

關爲後戶，玉壘、峨眉爲城郭，江、潛、緜、洛爲池澤，以汶山爲畜牧，南

中爲園苑。時荆地有一死者名鼈令，「令」一作「靈」。其尸亡至汶山，却是更生。見望

帝以爲蜀相。時巫山壅江，蜀地洪水，望帝使鼈令鑿巫山，治水有功。望帝

自以德薄，乃委國於鼈令，號曰開明。遂自亡去，化爲子規。故蜀人聞鳴云

我望帝也。《太平御覽》

望帝使鼈令治水，而淫其妻，令還，帝慙，遂化爲子規。杜宇死時適二月，而子規鳴，故蜀人聞之皆起。自開明以下五葉，始立宗廟。時蜀有五丁力士，能

徙山岳，每一王死，五丁輒爲立大石以一有『爲』字誌墓。今石筍是也，號曰筍里，未

有謚號，但以五行色爲主，故其廟稱青、赤、黑、白帝也。《太平御覽》

澍案筍，一引作『井』，誤。

蜀之先，肇於人皇之際，至黃帝子昌意娶蜀山氏女，生帝嚳，後封其支庶於蜀，歷夏、商、周，始稱王者。縱目名蠶叢，次曰魚鳧。其後有王曰杜宇，稱帝，號望帝。自以功德高諸王，乃以褒、斜爲前門，熊耳、靈關爲後戶，玉壘、峨嵋爲城郭，江、潛、緜、洛爲池澤，以汶山爲畜牧，南中爲園苑。時有荆人鼈靈死，其屍隨水上，荆人求之不得，鼈靈至汶山下復生，見望帝，望帝立以爲相。時巫山壅江，蜀地洪水，望帝使鼈靈鑿巫山，蜀得陸處，望帝

自以德不相若，禪位於鼈靈，號曰開明。遂自亡去，化爲子鵠鳥。故蜀人聞子鵠鳴曰：『是我望帝也。』鼈靈或爲鼈令，子鵠爲子鶴；或云：『杜宇死，子規鳴。』自開明下五葉，有開明帝始立宗廟。時天生五丁力士，能徙山，蜀王負力，不爲戰備，每一王死，五丁輒爲立大石，長三丈，重千鈞，以爲墓誌。今石筍是也，號曰筍里。未有謚號，但以五行色爲主，故其廟稱青、赤、黑、白帝也。《太平寰宇記》

帝顓頊高陽氏，黃帝之孫，昌意之子；母曰昌僕，亦謂之女樞。《史記正義》

昔蜀王從卒數千，一有『餘』字。出獵於褒谷。秦惠王亦畋於山中，怪而問之，以金一筐遺蜀王，及報，欺之以土。秦王大怒，其臣曰：『此秦得土之瑞也。』

秦王未知蜀道，乃刻石牛五頭，置金於尾下，僞如養之者，言此天牛能屎金。蜀人見而信之，乃令五丁共引牛成道，致之成都。秦始皇知蜀道，使張儀伐之，蜀王開明戰不勝而亡蜀。今地接故金牛縣界。《太平寰宇記》

澍案《初學記》引云：『秦王未知蜀道，乃刻石牛五頭，置金於尾下，言此天牛能糞金。蜀人信之，乃令五丁共引牛成道。今在褒城縣界。』

犍爲有犍爲山，因置犍道縣以屬焉。《太平寰宇記》

犍爲符闕水，南至斃，入江水。《水經注》

澍案一本引云：『黠水出符縣南，與溫水會，即闕水也，與斃水合。』

枳縣，在巴郡東南。《太平寰宇記》

澍案《國策》蘇氏謂楚得枳而國亡者，即是。

胸臆縣，『胸』音『蠢』，『臆』音『閏』。其地下溼，多胸臆蟲，因以名縣。故

城在今夔州雲安西，萬戶故城是也。

《吳漢傳注》

旄牛縣，屬蜀郡。《前書》曰：旄牛所出，歲貢其尾以爲節旄。

《後漢書注》

枳，在涪陵郡東。

《太平寰宇記》

澍案：枳，秦縣，即樂溫縣也。

日華水，出桂陽郴縣日華山西，至湘南縣入湘。

《水經注》

澍案《地理志》：『郴縣有耒水，出耒山西，至湘南西入湘。』

大別水南出耒陽縣太山，北至鄢縣入湖。

《水經注》

澍案縣有鄗湖，中有洲，洲上居民資以給，釀酒甚醇美，謂之鄗酒。又案大別水，即潯江水也。耒陽，屬桂陽郡。

漢章帝建初二年，徙鉅鹿恭王爲江陵王。三公上言：『江陵在京師正南，不可以封，乃徙爲安陸王。』《太平御覽》

防陵，在麋地，即春秋防渚也。杜《左傳》注

澍案一引云防，即防陵也，『麋』宜作『麋』。

江別人沔，爲夏水源。《水經注》引爲應劭《十三州記》

澍案劉澄之《永初山水記》云：『夏水，古文以爲滄浪漁父所歌也。』

潭州有萬里沙祠，西自湘川而東，至東萊萬里，故曰長沙。《史記正義》

澍案《太平御覽》引云：『西自湘江至東萊萬里，故曰長沙也。』《東方朔記》云：『南郡有萬里沙祠，自湘川至東萊，地可萬里，故曰長沙。』

漢壽縣，即索縣故城。漢順帝陽嘉中改從今名。興水所出，東入沅。《水經注》

澍案《太平寰宇記》：『西陽山興水所出，東入沅。《漢·地理志》以此水爲漸水，酈道元以爲沅水。』

《左傳》：『楚人伐弦，弦子奔黃。』鞞城，古弦子都也。《初學記》

定城，置在古黃子國南十二里。《太平御覽》《寰宇記》

澍案《路史》引作『二十里』。

廬水，西出長沙安成縣。武帝元光六年，封長沙定王子劉蒼爲侯國，即

王莽之用成也。吳寶鼎中立以爲安成郡，東至廬陵入湖，漢水也。《水經注》

澍案用成，《漢書》作『思成』。

牂柯者，江中山名也。晉懷帝永嘉五年，分牂柯置夜郎郡，兼置兗州。《太

平御覽》《太平寰宇記》

澍案《水經注》云：『牂柯，江中兩山名也。』《異物志》云：『牂柯者，繫船杙物也。其山在海中，小而高，可以繫船，俗人謂之越王牂柯。遠望甚小，石高不似山，望之似爲一株樹在水中也。』充，一引作『充』。

昔禹治洪水既畢，乃乘橋車到鐘山，祠上帝於北阿，歸大功於九天也。《太

平御覽》

澍案：此文亦見《十洲記》。橋，作『蹻』。

宜禾縣，屬敦煌郡。晉昌名郡，在後失之。《太平御覽》

澍案《後漢書注》：『伊吾盧本匈奴中地，漢既破呼衍，即其地置宜禾都尉，以爲屯田。今伊州納職縣伊吾故城是也。晉昌，本漢冥安縣。晉置晉昌郡及冥安縣。』

取慮故城，在漢屬臨淮郡。取如星分觜陬之陬，慮如《公羊》邾婁之婁。顧野王云：『取慮，讀爲秋間。』漢時汝南步游張少孤，四歲，母拾麥，爲人所賣，游張後爲取慮令。春月案行高年，至里，有病嫗，馬不前，自下問訊，乃其母也。《寰

宇記》

澍案《御覽》引闕駟曰：『取慮』讀若『陬閭』。

峴山張蓋雨滂沛。《古詩紀》

澍案峴山，即襄陽石梁山。出雲應驗，鄉人候之。白雲起定雨，黃雲起則風，黑雲起則多病。見《物類相感志》。

公安縣有孱陵城，吳大帝封呂蒙為孱陵侯，即此地也。《太平寰宇記》

澍案《荊州記》云：『劉備敗于襄陽，南奔荊州，吳孫權擢為左將軍荊州牧鎮之。時人稱備為左安軍，故名其城為公安。』《元和志》云：『公安本漢孱陵地，吳之南郡也。』